

BAB V

KACINDEKAN JEUNG SARAN

5.1 Kacindekan

Dina tradisi ngarumat barang pusaka di DésaLebakwangi-Batukarut kapanggih aya 53 léksikon budaya, diantaranya léksikon budaya anu kaasup kecap barang anu nuduhkeun pakarang, contona badi, kalak, pedang, jeung tumbak; kecap barang anu nuduhkeun waditra, contona léksikon bonang, saron, kecrék, jeung goong; kecap barang anu nuduhkeun parabot contona cingcin, buli-buli, jeung dakaréng; kecap barang anu nuduhkeun jelema, contona sesepuh, karuhun, jeung kuncén; kecap barang anu nuduhkeun kalengkepan acara, contona tumpeng, sasajén jeung bebeték. Kapanggih ogé léksikon budaya anu kaasup kecap pagawéan contona ngebakkeun, nabeuh, botram jeung ramah-tamah. Léksikon budaya anu kaasup katerangan tempat contona Balé Panglawungan, Bumi Alit, padaringan, jeung pajuaran. Léksikon budaya anu kaasup kana kecap katerangan waktu, contona kecap Mulud.

Éta léksikon téh umumna mangrupa kecap asal. Najan kitu, aya ogé mangrupa kecap rundayan kecap kantétan, jeung kecap rajékan.

Léksikon budaya winangun kecap asal kapanggih aya 14 pola anu umumna mibanda pola KV-KVK, anu pangsaeutikna, kapanggih aya 5 pola anu masing-masing nyaéta pola KV-KV-VK, KV-KV-KVKK, KVKK-KVKK, KV-KV-V-KVK, jeung KV-KV-KKVK. Sésana léksikon wangun kecap asal anu pola KV-KVK, pola KVK-KVK, pola KV-KV, pola KV-KKVK, pola KVKK-KVK, pola KV-KV-KVK, pola KVK-KVKK, jeung pola KV-KV-KKV.

Léksikon budaya winangun kecap kantétan umumna mibanda pola KB+KS, sésana mibanda pola KB+KB jeung KS+KS masing-masing.

Léksikon budaya winangun kecap rajékan umumna mangrupa kecap rajékan dwipurwa, sésana mangrupa kecap rajékan dwimurni jeung dwiréka masing-masing.

Léksikon budaya winangun kecap rundayan umumna mangrupa kecap rundayan anu ngagunakeun rarangkén hareup, sésana mangrupa kecap rundayan anu ngagunakeun rarangkén gabung, kecap rundayan anu ngagunakeun rarangkén barung, jeung kecap rundayan anu ngagunakeun rarangkén tukang.

Data léksikon budaya anu kakumpulkeun dipedar dumasar harti léksikal jeung harti kulturalna. Léksikon budaya anu boga harti léksikal kapanggih 53 kecap. Tina sakabéh jumlah data. Léksikon budaya anu boga harti kultural kapanggih 42 kecap.

Data léksikon budaya anu aya dina tradisi ngarumat barang pusaka di Désa Lebakwangi-Batukarut bisa dijadikeun sumber bahan pangajaran maca pedaran budaya di SMA.

5.2 Saran

Dumasar kana kacindekan di luhur, aya sababaraha hal anu bisa dipaluruh leuwih jero deui. Ku kituna, aya sababaraha saran nu kudu ditepikeun saperti anu ébréh di handap.

- a. Pikeun masarakat, hususna masarakat Désa Lebakwangi-Batukarut, dipiharep dina ngalaksanakeun ieu tradisi henteu saukur rutinitas wungkul, tapi kudu bener-bener mikanyaho sagala ajén jeung siloka anu nyangkaruk dina ieu tradis, lantaran sabada ditalungtik ieu tradisi téh pinuh ku ajén jeung siloka anu luhung.
- b. Lantaran ieu panalungtikan husus ngaguar léksikon budaya nu aya dina tradisi ngarumat barang pusaka di Désa Lebakwangi-Batukarut, masih kénéh dibutuhkeu panalungtikan séjén lantaran can aya nu bisa nyusud maluruh iraha mimitina ieu tradisi dilakonan ku masarakat, can kapaluruh ogé sejarah asal-usul goong rénténg nu aya di dinya, saha nu nyieunna, iraha dijieunna jeung naon tujuan mimiti dijieunna. Ku kituna, panalungtikan ngeunaan sajarah jeung budaya dina tradisi ngarumat barang pusaka di Désa Lebakwangi-Batukarut masih diperlukeun.
- c. Hasil tina ieu panalungtikan dipiharep bisa jadi alternatif bahan pangajaran di sakola, hususna dina pangajaran anu aya patalina jeung pedaran budaya.